

Kindali

Tufhamini lugha zetu

# Ukalata ughwa tupango utwa Chindali

---

## Kitabu cha hadithi za Kindali

---





# Ukalata ughwa tupango utwa Chindali

## Kitabu cha hadithi za Kindali

Huduma ya Kutafsiri Biblia  
na Kuendeleza Luga za Asili, Mbeya  
S.L.P. 6359, Mbeya, Tanzania  
[literacy\\_mbeya@sil.org](mailto:literacy_mbeya@sil.org)

Pamoja na  
SIL International



## **Utangulizi**

Huduma ya Kutafsiri Biblia na Kuendeleza Lugha za Asili, Mbeya ilianza tarehe 23 Julai 2003. Ilianza kwa ushirikiano kati ya viongozi wa makanisa na mashirika mbali mbali na SIL International.

Kusudi letu ni kuwahudumia watu wa makabila yafuatayo: Wabena, Wabungu, Wakinga, Wakisi, Wamalila, Wamanda, Wandali, Wanyakyusa, Wanyiha, Wapangwa, Wasafwa, Wasangu na Wavwanji.

**Lengo letu la kwanza** ni kuyafikia makabila hayo kwa Neno la Mungu (Biblia) katika lugha zao kwa sababu tunaamini MUNGU ANAONGEA LUGHA ZOTE!

**Lengo letu la pili** ni kuwaheshimu watu wa makabila haya kwa njia ya kuwafundisha kusoma na kuandika lugha zao (Idara ya Kusoma na Kuandika Kilugha).

Sera ya Utamaduni ya Tanzania inasema hivi:

### *3.2. Lugha za Jamii*

*Lugha za jamii ni hazina kuu ya historia, mila, desturi, teknolojia na utamaduni wetu kwa jumla. Aidha, lugha hizi ni msingi wa lugha yetu ya taifa, yaani Kiswahili...*

**Kichwa:** Ukalata ughwa tupango utwa Chindali (Ndali Story Book)

**Lugha:** Kindali

**Michoro:** Benny J. Mwesya na Ally R. Mulungu

**Kimeandikwa na:** Edwin Chibona, Mch. George Kajange, Ester Lwinga na Enita Songa

# **Shiisho shiliimwo**

<b>Imitu iya tupango</b>	<b>Ubhukulaasa</b>
1. UChiiya nu sheela	1
2. Umundu ughwa chisa	3
3. UMasaayi umukabhi	4
4. UNaakafuka, uNaayeeta nu Naalita	6
5. INguku nu Kuubhi	7
6. Umwiko ughwa kushita kulya amaghe	9
7. UKalulu, iMbogho ni Sofu	10
8. Ulukwegho	12
9. UKayondo na bhaana bhaake	13
10. UKakokwe nu Luusa	15
11. Akapango aka Shaanalooli	17
12. Akapango aka Yoona nu mukashi	18
13. Akapango aka Nongi na bhaana	20
14. Abhaana abhakata	22
15. UKalulu ni ngalamu	24
16. Akapango aka Kayamba nu Kalulu	25
17. Akapango aka “Indyeki”	26
18. Akapango aka Bhaaswigha nu mwana ghwake uChiipo	28
19. Ulusekelo ulwa Kafuki ulwa maashooshi	30
20. Akapango aka Mwilaseghe na bhaana bhaake	32



# 1. UCHIIYA NU SHEELA

Akabhaapo umundu yumo yuuyo ingamu yaake akabha ghwi Chiiya. Umundu uyo akiikalagha mu kaaya aka mu Bhulambya. Akaaya aka kakabha ni fighamba ifyingi leka fiifyo fikabha na makokwe amingi leka. Ulu amakokwe ghooshi ghashilite ku nongwa iya kutema mwalwe imighunda ni ingwi, soona bhoope na bhandu bhoongela pakubhaala ku kabhalilo aka.

Bhwo amakokwe amingi ghaliimwo mu fighamba, fyope ifikanu fikabha fyingi ngaani, fimo fikaghonagha mupiipiishe nu twaya utwa bhandu. Abhandu abhingi bhakiilumbuushanga leka ku nongwa iya nduuli nu sheela paapo bhakiikatagha imbushi, ing'ombe pamupeene ni nguku shaabho. Abhaana abhakeke bhatakabhuukagha pakuliisha ing'ombe bheene, loole bhakabhuukagha na bhosongo bhamu. Amashiku ghamu abhonduuli na bhosheela bhakakuutagha bhushiku bhwoshi ukwisa kufika pangeelo. Po abhandu abhingi bhakaghonagha maaso ukulindilila ichuumma chaabho. Soona bhamu bhakasughagha abhokabhwa ukuti bhabhafwange ukulindilila pabhushiku linga abheene bhapitile.

Po uChiiya akasenga inyumba shaake kupiipi na kaghamba, po amakokwe ghakakashunguulila akaaya kooshi. Umundu yula akabha ni chuuma ichingi leka, chimo chikaghonagha mu nyumba, chimo akachisengela ichibhagha kuuse. Soona akasugha abhokabhwa bhatatu bhaabho bhakamwafwanga ukulindilila pa kaaya nu kubhingila ifikanu ifya mu chiposo ukuti ayaaghaghe inyama iya kulya.



Ishiku limo, pabhushiku bhwo uChiiya aghonite, akanyomoka bhwo akupulika abhokabhwa bhaake bhakubhwaka. Nakalinga akanyatuka, akeegha ingwegho shaake, isuula ni sembe akafuma kuuse. Akabhaagha abhokabhwa bhabhungaanite bhakutesha kumwanya ku ikokwe. Ghwepe bhwo aatesha kumwanya ku ikokwe, akamubhona usheela iimite pakati pi ikokwe. Akaghela ukunyomoka mu ndumbula yaake, loole ku nongwa iya bhuliisha, akiikasha ngaani. Po akakwata bwisa imyenda yaake, akiiyughaania mu ndumbula yaake akati, “Umuusughu twakomaana.” Akamubhuula soona usheela akati, “Ika lubhilo linga uli na maka.”

Bhwo usheela aamubhona umundu yula, akaghuluma ishu ikulu ukuti amwoghofye umundu yula akinde. Loole umundu yula akeegha ichikokwe akamulasa usheela. Po usheela akatunguka kumwanya ku ikokwe, akaghwa paase akati, “Napuu.” Bhwo aaghwa, akaghela ukuti amunyeelele umundu yula, akapootwa. Po umundu yula akeegha ingwegho akamulasa nayo usheela. Abhokabhwa bhakamunyelela usheela nu kumulumania mu shingo, akafwa pala pala. Abhandu abhingi bhakabhungaana ukwisa pakumwafwa uChiiya, po bhakaagha aamughogha usheela. Po bhakamupaalisha bhakati, “Ghwe ndagha ghwapona, uChaala aakwafwa!” Bhwo bhwacha ichipanga chooshi chikabhungaana ukwisa pakumutesha usheela yula. Abhandu bhooshi bhakaswighagha. Ukwanda ishiku lila, uChiiya akabha mufumukwe pa chiisu chaabho chooshi.



## 2. UMUNDU UGHWA CHISA

Akabhaapo umundu yumo yuuyo ingamu yaake akabha ghwi Ghwachisa. Imbombo shaake shiisho akabhombagha shikalangishanga ukuti ali ni chisa ukufuma mu ndumbula yaake na mu bhwumi bhwake. Umundu uyo akabha nu tundu twoshi tuutwo tukulondighwanga mu bhwumi ubhwa bhandu ni fipelighwa fyoshi ifya kusugha fiifyo fili ku bhwumi.

Po umundu yula akashimanya ukuti abhandu bhaabho apalamanite nabho bhafumbitwe nafyo fiifyo umwene ali nafyo. Po akafumusha akati, "Ghweshi umundu yuuyo afumbitwe kooshi kala kaako atali nako, iisaghe kukwangu pakwegha. Manye iisaghe ni hela isha kughulila, loole iisaghe ni ndumbula yiiyo yikwiyiisha." Po abhandu abhingi bhaabho bhakabhuuka ni ndumbula isha matingo pamu isha lufuuyo, bhakapootwanga ukufyaghya fiifyo bhakafilondagha. Loole bhaabho bhakabhuukagha ni ndumbula iya kwiyiisha, bhakafyaghagha fiifyo bhakafilondagha.

Akapango aka kakutumanyisha muumwo ishu ilya Chaala likutulingaania ukuti bhwo uYeesu ali pa chiisu panu, akafumushanga ukuti abhandu bhooshi bhaabho bhakulonda ubhwumi ubhwa kumwanya, bhabhuukaghe kukwake po indibhakabhwaghe. (*Linga kulonda ukushaaghania ingaani, bhelenga mwa kalata ughwa Mataayi 11:28; Yelemiiya 31:25.*) Soona linga tukubhelenga ishu ilya Chaala pabhunine likutubhuula ukuti uChaala akwikala mu ndumbula iya mundu yuuyo akwiyiisha bhwila na bhwila. (*Linga kulonda ukushaaghania ingaani, bhelenga mwa kalata ughwa Yesaaya 66:2.*)



### **3. UMASAAYI UMUKABHI**

Pabhusutali ngaani ku chipanga icha ku Ishoola, akabhaapo umundu yumo yuuyo ingamu yaake akabha ghwi Masaayi. Akeegha umukolo yuuyo ingamu yaake akabha ghwi Twaghile. Abhandu abha bhabhili bhakabha bhakabhi leka. UChaala akabhaafwa ukupaapa umwana yumoywene yuuyo akabha mulindu. Ingamu iya mwana ghwabho akabha ghwi Mushisha. Po umwana ghwabho akeendelelagha ukukula ukubha ghwi songo. Po abhalumyana bhakaanda ukumulonda ukuti bhamweghe. Loole ughwise, uMasaayi akabha nu lwiho lumo, akamubhuula umwana gwake akati, “Linga abhalumyana bhakukulonda ukuti bhakweghe, inditukabhiitishe ukuti tubhuuke nabho ku ikombe. Linga twafika nabho ku ikombe, indiingakubhuule isha kubhomba.” Umwana gwake uMushisha akiitikana na shooshi shiisho ughwise akamulingaania.

Bhwo ishiku lyafika, bhakabhuuka nu ghwise ku ikombe pamupeene na bhalumyana bhaabho bhakamulondagha. Bhwo bhaafika ku ikombe, ughwise akamukwasha umwana gwake ighabhuni iitali ngaani liilyo likabha ni nyambi. Po akasolongesha ihela inyingi mu ighabhuni ilya mwana gwake. Akamubhuula akati, “Bhuuka ghwime pala!” Po uMushisha akabhomba shooshi isa muumwo ughwise akamubhuulila. Soona akamubhuula akati, “Linga ghwagha umulumyana akupalamila kukwako, ise uponiange ihela paase nu kukinda ngaani mundaashi, loole linga ghwagha yuuyo aakwagha nu kukwikata, ghwe yuuyo indiise abhange mulume ghwako.” Umwana gwake akiitika.

Po ughwise akabhasanukila abhalumyana, akabhabhuula akati, “Linga yuuyo aakinda ngaani nu kumwikata umulindu uyu, po abhagiile ukubha mukashi gwake. Une indakulonda naakamu kukwinyu.” Po abhalumyana bhala bhakahobhoka ngaani nu kumupaalisha uMasaayi bhakati, “Ndagha ghwabhomba ukutupa umwana ghwako.” Po uMasaayi akabhiitisha bhooshi ukuti bhiime mu lubhambo soona akabhabhuula akati, “Mwande mukindaghe ukuti mumwikate umwana ghwangu.”

Po bhooshi bhakaanda ukukinda. Linga umulumyana yuuyo akupalamila ukumwagha umulindu, umulindu akaponianga ihela mu nyuma.

Po umulumyana yula akafulamagha ukusebha ihela. UMushisha akeendelela ukukinda nu kuponia ihela mu nyuma. Po abhingi bhakapootwa ukumwikata uMushisha ku nongwa iya kufulama nu kusebha ihela.

Pabhumalilo, umulumyana yumo yuuyo akabha mupiina, akakinda ngaani, akaya amwikata uMushisha. Umwene atakalondagha nu kufulama ukuti asebhe ihela, loole akamulondagha uMushisha ukuti abhe mukashi ghwake ghwa nalooli. Bhwo aamwagha nu kumwikata uMushisha, akiisa naghwe kwa ghwise uMasaayi. Po ughwise akamubhuula akati, "Naakupa umwana ghwangu ukubha mukashi ghwako, paapo naamanya ukuti umughanite ukukinda ihela. Soona ulu po ingubhapa ni hela inyingi isha kubhaafwa mu bhwumi bhwinyu bhwoshi." Po akabhapa ichuumma ichingi ngaani. UMushisha nu mulume bhakabhwela ku kaaya kaabho.

Akapango aka kakutumanyisha ukuti manye tubhabhombelaghe abho Chaala bhabhili, soona manye tumubhombelaghe uChaala ni hela.



## 4. UNAAKAFUKA, UNAAYEETA NU NAALITA

Pabhubutali ngaani bhakabhaapo abhandu bhamu bhatatu, bhaabho bhakiikalagha ku chipanga icha ku Chiiya. Ingamu shaabho yumo akabha ghwi Naakafuka, umunine akabha ghwi Nayeeta nu yungi akabha ghwi Naalita. Imbombo yaabho yikabha ya kulima nu kubyala amalima. Bhatakabha ni nyumba naayimo iya kwikala. Po amashiku ghooshi bhakiinong'onagha ukuti bhabhe ni nyumba yaabho iya kwikala. Ku lusako ulwisa bhooshi bhatatu, bhakabha nu bhumanyi ubhwa kusenga inyumba.

UNaakafuka akabha mumanyi ughwa kufyatula amapamba nu kupemba, po akabhomba imbombo iya kufyatula amapamba nu kupemba. UNaayeeta akabha mumanyi ughwa kupima inyumba nu kusenga. Umwene akapima inyumba nu kusenga. Ghwepe uNaalita akabha mumanyi ughwa kupalika, ukulatika, ukwilika nu kukonyolela kumwanya. Bhwo bhaamala ukuyisenga inyumba yila, bhakaanda ukukaanikana bheene-bheene ukuti inyumba iyi yangu, umunine akatingi yangu.

Pabhumalilo bhakapootwa ukwitikana paapo bhooshi bhatatu bhakabhomba imbombo, uyu iyaake, uyu iyaake. Kali, linga ghweghwe, kwinong'ona ukuti inyumba yila linga bhakayabhanagha, ngali yikabha yaani?



## 5. INGUKU NU KUUBHI

Kubhwandilo iNguku nu Kuubhi fikamanyana leka. Fikiikalagha nu kughenda pamupeene.

Ishiku limo, umwenda ughwa mwana ughwa Nguku ghukanyaapuka. INguku yikaswimaana nu kwilumbuusha yikati, "Kali, imbombe kooni?" Nakalinga yikiinong'ona ukubhuuka ku mumanyani ghwake uKuubhi ukuti yiye yaashime isindaano iya kusonela umwenda. Po yikalaabhila pangeelo ngaani ukubhuuka kwa Kuubhi. Bhwo yaafika, yikamwagha uKuubhi ikiile nu mukashi. UKuubhi akayibhuusha iNguku akati, "Ghwe mumanyani ghwangu, kali, kooni kaako ghwalaabhila pangeelo ulu?" Po iNguku yikamwamula yikati, "Naakutungila mumanyani ghwangu, ingusuma ghuunyaafwe shimo." UKuubhi akayibhuusha Inguku akati, "Kali, kusuma ingwafwe kooni?" INguku yikamwamula yikati, "Niisa pakwashima isindaano iya kusonela umwenda ghwangu ghuughwo ghunyaapukite." Po uKuubhi akayaamula iNguku akati, "Naapulika, indiingupe isindaano, loole umuuusughu naayimo, abhanyiinyu bhaashimite, ukiise ghweghe ningeelo." Po iNguku yikaghala nu lusuubbilo ulukulu ngaani.



Bhwo bhwacha ishiku ilya ningeelo, iNguku yikalaabhila ngaani ukubhuuka kwa Kuubhi. Bhwo yaafika, yikamwagha uKuubhi ikiile pa chitengu mu nyumba yaake. Po iNguku yikamubhuula ukuti yiisa soona pakwashima isindaano iya kusonela. Nakalinga, uKuubhi akalonda isindaano nu kuyipa iNguku, loole akayilaghilila akati, “Ingusuma ngaani ghwise uyighalushe isindaano iyo namasubha.” INguku yikapokeela nu kupaalisha, yikiitika yikati, “Indiniise ingalushe namasubha.”

Bhwo iNguku yaafika ku kaaya kaake, ku lusako ulubhiibhi isindaano yila yikaghwa pi ilongwi nu kusobha bhwo yikaali nu kusonela umwenda ghwake. Po yikaanda ukupalasa paase ukulonda isindaano, yitakaghala kwa ukubhuuka kwa Kuubhi soona pakughalusha isindaano.

Bhwo uKuubhi aagha kwabha myee, akayikonga iNguku ku kaaya kaake ukuti aye eeghe isindaano yaake. Bhwo aafika, akayaagha iNguku yili pakupalasa paase. Bhwo iNguku yaamubhona uKuubhi, yikalwika lwiii! Soona yikakuuta, “Kwee kwee.” Nakalinga, uKuubhi akanyomoka mu ndumbula yaake, akayibhuusha iNguku akati, “Kali, kulonda kooni paase, soona kooni kulwika nu kukuuta?” INguku yikamwamula yikati, “Ghuuhobhokele ngaani mumanyani ghwangu, ingulonda isindaano yaako yisobhite. Yo yiiyo nongwa iyi ingupalasa paase ukuti indoonde, injaghe.” Bhwo uKuubhi aapulika, nakalinga, akakalala mu ndumbula yaake akati, “Une indakukuhobhokela, loole ingulonda ghumbe isindaano yangu. Linga ghwapootwa ukuumba isindaano yangu, ubhumananyani bhwitu bhwashila, ghwabha mulughu ghwangu. Ukwanda umuusughu indiniikataghe utwana twako ukufika paapo ghwaya ghwaghala isindaano yangu.”

Yo yiiyo nongwa iyi iNguku yikupalasagha paase, yikulondagha isindaano iya Kuubhi, soona akabhalilo kooshi iNguku linga yaamubhona uKuubhi, yikulwika nu kukuuta ngaani nu twana twake tukumukinda uKuubhi ukufika muusughu.

## 6. UMWIKO UGHWA KUSHITA KULYA AMAGHE

Ku fyinja ifya kunyuma ngaani, yikabhaapo imyiko imyingi yiyo abhandu abhingi bhakayikongagha. Umwiko ghumo ghukabha ghwa kushita kulya amaghe ku bhakolo bhaabo bhali pabhung'wamu. Abhandu abhingi bhakabhaanishanga abhakolo ukulya amaghe ku nongwa iya kuti bhakatingi linga yuuyo aalya, indiakapaape umwana yuuyo atali ni ching'wili. Abhandu abhingi bhalumeenye leka ulwiho ulwo. Po umukolo ghweshi yuuyo akiimanyagha ukuti ali pabhung'wamu, akalekagha ukulya amaghe.

Ku lubhafu lumo, ulwiho ulwo lukabha lwisa paapo abhingi bhakooghopagha ngaani ukuti linga umukolo yuuyo ali pabhung'wamu aalya amaghe, abhaghiile ukupaapa umwana yuuyo mukulu ngaani. Po linga akabhalilo aka kupaapa umwana kaafika, bhakatingi umwana indiapootwe ukufuma. Linga aapootwa ukufuma, po bhwabhangha bhufwe. Paapo utubhalilo tula ifipataala fitakabhaakwo ifya kuti bhabhaghiile ukubhuuka naghwe ukuti bhamupanje isa muumwo bhakubhombela amashiku agha. Paapo amashiku agha, linga bhaagha umukolo akupootwa ukupaapa umwana yuuyo mukulu, bhakubhuuka naghwe ku chipataala nu kumupanja.

Ku lubhafu ulungi, ulwiho ulwo lwali lubhiibhi paapo ung'ina atakabhangha na maka mu mubhili, ghwepe umwana akabhangha mupeseeshe. Ku mashiku agha, ulwiho ulwo ku bhandu abhingi lushilite paapo isilikali yiitu pamupeene ni chipanga, fikumanyishanga ukuti abhakolo bhooshi bhaabho bhali pabhung'wamu bhalange amaghe amashiku ghooshi. Paapo linga umukolo akulya amaghe, po abhaghiile ukubha na maka mu mubhili ghwake, soona  umwana ghwake yuuyo ali mukati akubhangha akiisa leka. Po abhakolo abhingi bhakumanyila inyingi leka linga bhakubhuuka ku chipataala.


Tukubhasuma mwe bhakolo mweshi mwe muli ni ifukwe mubhuukaghe pakupima ku chipataala nu kulya amaghe amashiku ghooshi ukuti imibhili yiinyu yibhange na maka. Soona ukuti umwana yuuyo ali mukati abhange mukulu nu mubhili umwisa.



## 7. UKALULU, IMBOGHO NI SOFU

Pabhubutali ngaani, uKalulu chikabha chikanu ichichefu, icha lukaani soona icha miifuno. Ichikanu icho chikapoota ifikanu fyoshi ifya mu chitengele.

Ishiku limo uKalulu akakomaana ni chikanu chimo ichikulu chiicho tukuti iMbogho. UKalulu akayilamuka nu kuyibhuusha Imbogho, akati, "Ingupulika ukuti bhati uli na maka amingi ngaani ukukinda ifikanu fyoshi mu chitengele muno. Kali, isho sha nalooli?" IMbogho yikamwamula yikati, "Isho kuyugha sha nalooli, une neene indi na maka ukukinda ifikanu fyoshi fiifyo filiimwo mu chiisu chooshi ichi." Bhwo uKalulu aapulika, akayibhuula iMbogho akati, "Nalooli kwitesha ukuti uli na maka leka, loole utabhaghiile ukuumboota une linga tukughuusana paapo nuune indi na maka ukufipoota ifikanu fyoshi." IMbogho yikamwamula yikati, "Asee! Ughwe ghwe kanandi leka soona utali na maka naaghamu, tutabhaghiile ukughuusana tweshi." UKalulu akayaamula iMbogho akati, "Manye ghwifunaghe, ulu naabhuuka pakulonda ulughoye ukuti tukaghussane tweshi ishiku ilya ningeelo." IMbogho yikiitika yikati, "Ningeelo tukakomaane ukuti tukaghussane tweshi." UKalulu



akayaagha iSofu yiimite pi ikokwe, akayibhuula akati, “Ughwe ghwi Sofu imbaghiile ukukupoota amaka linga tukughuusana tweshi.” ISofu yikamwamula yikati, “Fumba ku mulomu, leka ukuyugha inongwa isho, kwitesha ukuti tungaghuisana tweshi une nuughwe. Kali, utakwibhona ukuti ughwe ghwe kanandi leka, soona utali na maka naaghamu mu mubhili ghwako?” uKalulu akayibhuula iSofu akati, “Linga kulonda ukuti ughabhone amaka ghangu, tukakomaane ningeelo ukuti tukaghuisane tweshi.” ISofu yikiitika inongwa isha Kalulu. Po bhakalekaana.

Bhwo lyafika ishiku ilya ningeelo, uKalulu akalonda ulughoye, akabhuuka, akayipinya iMbogho ku lubhafu lumo, soona akayipinya iSofu ku lubhafu ulunine. Po umwene akaya iima pakati, akayibhuula iMbogho akati, “Linga naaleghesha ulughoye, ise ghwandaghe pakughuusa.” Akayibhuula ni Sofu yooke isa bhubhuuhwo. Po akiima pakati nu kuleghesha ulughoye. Ifikanu fila fibhili fikaanda ukughuusana ku maka ngaani. Fyoshi fikiinong’onagha ukuti fikughuusana nu Kalulu, loole ngimba fikughuusanagha fyene-fyene chishita kumanya.

Bhwo fyalita, fikatuusha. Po ukalulu akabhuuka ku Mbogho akati, “Kali, ghwaghabbona amaka ghangu?” Po iMbogho yikiitika yikati, “Nalooli naaghabbona amaka ghaako, niitika ukuti uli na maka.” Soona akabhuuka ku Sofu akayibhuusha akati, “Kali, ughwe, ghwaghabbona amaka ghangu?” ISofu yikiitika yikati, “Nalooli, ughwe uli na maka amingi ngaani, ulu ghwamboota.”

Ishi sha nalooli ukuti uKalulu akafilwisania ifikanu fibhili ifikulu pa nongwa iya bhuchefu bhwake.

## 8. ULUKWEGHO

Ulukwegho mu njugha iya Chindali tubhaghiile ukulingaania ukuti bhufwe pamu tubhaghiile ukuti ukufwa. Ulukwegho lukufumila ku mundu yuuyo aafwa ubhufwe ubhwa kwighogha mwene pamu linga abhandu abhangi bhaamughogha. Soona, ulukwegho lubhaghiile ukubhoneka linga ichikanu chaamughogha umundu pamu linga umundu aagwa mu ikokwe. Shiliipo inyingi shiisho shikulingaania ngaani ubhufwe ubhwa lukwegho. Loole une naakusimbila inandi ishi ukuti ushaaghanie pamu ingukumbushe panandiishe.

Bhwilaashe linga umundu yumo aafwa ubhufwe ubhwa lukwegho, po bhatakashiilagha chishita kumwitisha umughanga ughwa kulupiiya ulukwegho ulwo. Bhakooghopagha leka ukuti linga bhataapiiya pamu ukulufunga, bhoope indibhakafwe ubhufwe isa bhubhuuhwero pamu ukubha na kakoola kaako bhakatingi ulweseese.

Linga abhandu bhaamala ukukumba ipumba, bhakashingulagha mukati mu ipumba. Linga bhaassingula, po bhakaghubbiiikagha umufimba ghula mukati mu ipumba. Bhatakaghubbiiikagha ku mbako iya bhwina bhula, loole bhakaghubbiiikagha pabhweluushe, soona bhakaghufuulagha imyenda yooshi. Bhakaghushulikagha icheeni chaake paase nu kughuposola utusamba utwa tukono. Imbombo ingafu yikabha iya kukamatila imilembo mu ipumba yiiyo bhakatingi imboshio bhwo bhakaali ukushiila. Imilembo iyo yikaboshanga umukooshi ghwoshi ughwa lukwegho. Linga bhaamala ukushiila, po umughanga akabhapanga imboshio yila abhandu bhooshi ukuti

bhang'we. Abhandu bhakang'wanga imboshio ukuti ulukwegho manye lubhasambukilaghe.

Linga umughanga yula aamala ukubhomba imbombo iyo iya kupiyya ulukwegho ulwo, abhene ifwa bhakamuuhombagha umughanga ing'ombe yimo nu nang'ooshi ughwa kupiyyila. Imbombo ishi shikuleka panandi panandi, loole shishaalite ku bhandu bhaabho bhakaali ukumwitika nu kumusubhaalila uChaala.



## **9. UKAYONDO NA BHAANA BHAAKE**

Pabhutali ngaani ku chipanga icha ku Kapanga, akabhaapo umundu yumo yuuyo ingamu yaake akabha ghwi Kayondo. Umundu uyo akabhabhungaanianga abhaana bhaake nu kwanda ukwangala nabho isha bhwoesongo.

Ishiku limo uKayondo akabhiitisha abhaana nu kwikala nabho. Akaanda ukubhabhuula akati, "Bhaana bhangu, ichiisu ichi tulimwo chipalapala leka, po chikulonda ukuti umundu ghweshi abhange na mahala pamu inyinong'ono inyiisa isha kwikalila mu chiisu muno." Abhaana bhaake bhakamubhuusha bhakati, "Ghwe taata, injugha yaako tutakuyaaghania na kaakanandi, kali, kwo kuti kooni? Twapela tulingaanie." UKayondo yuuyo akabha ghwi ghwise, akaanda ukubhalingaania abhaana bhaake akati, "Umundu ghweshi linga mukeke pamu linga akukula, inong'onaghe ukuti mundaashi mumwake bhuliikwo ubhutolwe pamu yiliikwo ingalamu ingali leka yiyo linga aakomaana nayo, yibhaghiile ukumwikata nu kumughogha bhwo akaali ukufika ifyinja ifya kufwila pamu ifya bhughome." Akeendelela ukubhalingaania akati, "Ubhughome yo yiyo ngalamu yiyo yili mundaashi mu mundu ghweshi. Ulu bhaana



bhangu ingubhabhuula ukuti linga mutakwikaakila ukulonda ifindu pamu ukubhomba imbombo bhwo mukaali muli na maka, ubhughome bhukwisa. Po indimukapelagheeshe ichisa bhwo mutali nako naakamu. Indimukapootwange ukulya ifindu ifyisa nu kukwata akiisa. Lumo indimukatingi abhaana bhiinyu bhatabghanite soona bhakunyonywa ukuti mufwe lubhilo, loole ngimba bhwo shitali.” Akamaliisha ukubhabhuula akati, “Ulu mweshi muli na maka, kaali kiisa ukuti mughulaghe ing’ombe pamu ukusenga inyumba inyingi pamu ukubyala amakokwe. Ifi fyoshi fibhaggiile ukubhaafwa bhwo mwaghoma.” Bhwo aamala ukuyugha nabho, bhakabhwela mu twaya twabho.

Ishiku inine uKayondo akabhiitisha abhaana soona, akeendelela ukubhalingaania isha mabhine amaheesha. Akabhabhuula akati, “Mwe bhaana bhangu, umuusughu ingulonda imbalangaanie isha mabhine amaheesha. Utwe luulwo twakulagha, ghatakabhaapo amabhine amaheesha agha kuswighisha isa ghaagho ghaliipo umuusughu.” Abhaana bhaake bhakamubhuusha bhakati, “Ghwe taata, kali, gho mabhine ghaki ghaagho ghataaliikwo kunyuma ukwo loole ulu ghaliipo?” Ughwise akabhamuula akati, “Fyinja finandiishe fiifyo twandite ukupulika ubhubhine ubhupya ubhwa BHUKIMWI bhuubhwo bhutali nu mulembo naaghemo. Ubhubhine ubhwo bhukughogha abhandu bhooshi abha fikolo fyoshi. Bhukughogha abhasungu, abhatiitu, abhaana abhakeke, abhosongo, abhapiina na bhakabhi. Abhaghanga abhingi bhakulonda imilembo iya luko nu luko, loole bhakupootwa. Mwe bhaana bhangu, ingubhasuma ngaani ukuti mwisungaghe mu blhwumi blhwinyu ukuti mwise mufike isa muumwo twakula twafika mu bhughome.”

Bhwo uKayondo aamala ukubhalingaania, abhaana bhaake bhakapulika nu kushaaghania. Bhoope bhakiitika ukuti indibhashikongaghe shooshi shiisho akabhalangaania. Bhakahobhoka ngaani nu kumupaalisha ughwise bhakati, “Ghwe taata, ndagha ghwatumanyisha imbombo inyiisa isha kubhomba na kayilo akiisa aka kutwafwa ukwikala pa chiisu icha tubhalilo utu.”

## 10. UKAKOKWE NU LUUSA

Pabhubutali ngaani bhakabhaapo abhandu bhabhili bhaabho bhakabha bhamanyani ngaani. Bhooshi bhakiikalagha pa chipanga chimocheene. Ingamu shaabho yumo akabha ghwi Kakokwe nu munine akabha ghwi Luusa. Amashiku amingi bhakabhuukagha pakwangala uyu ku munine uyu ku munine. Ubhumanyani bhwabho bhukabhamanyishanga inyingi ngaani isha mu nyumba shaabho. Umundu ghweshi akateshanga muumwo umunine akwikalila nu mukashi. Imbombo nyingi leka shiisho bhakashitendeelagha.

Bhakateshanga ukwangala kwabho mu nyumba na bhakashi. Bhakateshanga muumwo abhakashi bhaabho bhakapiiyilagha ifindu fyabho. Bhakateshanga muumwo abhakashi bhaabho bhakapokeelelagha abhaheesha.

Utundu twangi leka tuutwo bhakateshanga mu bhumanyani bhwabho. Loole uLuusa ku mashiku ghooshi ghaagho akabhuukagha ku



munine, akamanyilagha shimo isha kuti uKakokwe nu mukashi bhakaangalagha akiisa leka. Loole umwene akiibhonagha ukuti bhatakwangala akiisa nu mukash. Abheene bhakalwanga bhwilaashe. Po uLuusa akalonda isila yimo iya kumushimbula uKakokwe ukuti bhoope bhalwange nu mukashi. Akaanda ukumumanyisha akati, "Ghwe mumanyani ghwangu, kali, umeenye ukuti umukashi ghwako pamu umukolo ghweshi linga utakumukomaamwo naalumo pamu utakumutukaamwo naalumo, akunyeekelela nu kubha na matingo leka?" UKakokwe akamwamula akati, "Isho kuyugha indashipulikiteemwo naalumo, loole ingupulika umuusughu ukufuma kukwako." Akoongelesha ukumubhuusha akati, "Kali, ugheliteemwo lumo ukwikoma yughweghwe pamu bhamu bhakukomiteemwo lumo pamu ukukutuka?" ULuusa akamwamula akati, "Ukufuma muumwo ingapaapighwa, bhataangomiteemwo naalumo une pamu ukuunduka."

Bhwo ichinja chimo chaakinda, abhandu bhamu bhakalwanga. Po uLuusa akabhuuka pakulesaan. Ku lusako ulubhiibhi abhandu bhala bhaabho bhakalwanga, yumo akasanuka nu kumukoma uLuusa ni mbuli "Puu." Po uLuusa akakuuta akati, "Umwese, ingufwa! Umwese, ingufwa! Mwe mboke, ingufwa!" Kuno akulila amashooshi ghakutonya. Bhakamukoma nu kumutuka ngaani bhakati, "Ghwe likonyofu ughwe! Ghwisagha kuliiki pakutulesaan! Gwakeeta! Makoshi ghaako! Twakufinia." Po uLuusa akakalala leka, akabhwela ku kaaya bhwo aswimaanite ngaani.

Bhwo aafika ku kaaya, akamupangila umukashi shiisho shikawagha akati, "Ghwe mukashi ghwangu, ukufuma umuusughu, naaleka pakukutuka amaheelu, soona naaleka nu kubhashimbula abhandu ukuti bhalwange paapo ukukomighwa kukubhabha na maheelu ghoope ghakubhabha leka." Po akabhuuka kwa Kakokwe, umumanyani ghwake akamupangila shooshi shiisho abhandu bhala bhakamubhombela. Akamubhuula akati, "Ulu naamanyaila ngaani ukuti ukukoma nu kutuka abhandu kubhiibhi, indaingandishe, ukukushimbula kwope naaleka." UKakokwe akamupaalisha akati, "Ndagha ghwamanyila isukuulu iyo, uChaala akwafwe ukubha nu lutengaano mu nyumba yaako."

## 11. AKAPANGO AKA SHAANALOOLI

Mu chinja icha 1967, akabhaakwo umukolo yumo yuuyo ingamu yaake akabha ghwi Shaanalooli. UShaanalooli akiikalagha ku chipanga icha ku Chibhwe. Umukolo uyo akabha nu mwana yumoyweneeshe yuuyo akabha mukekeeshe, akamupaapaghya panyuma.

Ishiku limo uShaanalooli akachuulagha ukubhuuka ku Malaabhi. Bhwo akughenda mu sila, isala yikaanda ukumubhabha. Po akiinong'ona ngaani isila iya kufyagha ifindu ifya kulya. Bhwo akukelengania, nakalinga akabhabhona abhokambaani bhatonite mu mughunda ughwa mundu. Po akatumula mu ndumbula yaake ukupaaghuku nu kubhuuka mu mughunda ghula. Bhwo aafika papiipi, akatesha abhandu kuno na kuno, akaagha naabhamu. Po akaghholosha akakono ukuti eeghe amatone ghalia. Po umwana yuuyo akamupaapa panyuma akamubhuusha akati, "Ghwe maayi, bhwo ukaali ukugholosha akakono ukuti ghweghe amatone, ingukubhuusha ukuti kali, kooni ghwatesha kuno na kuno, loole utaatesha kumwanya kuukwo uChaala ali?" Pala pala ung'ina akanyomoka ngaani mu ndumbula yaake bhwo aapulika umwana akumubhuusha amashu agho. Nakalinga, uShaanalooli akaghaleka amatone ghalia, isala yikaleka nu kubhabha. Po akaghalaaka mu sila nu kupululila ni sila yaake.

Bhwo aafika ku bhakamu bhaake, akalingaania shooshi shiisho akashibhona mu sila. Po abhakamu bhaake bhakamubhuula bhakati, "Manye ukaandishange ukwegha ifindu ifya bhandu chishita kusuma, soona umwoghopaghe uChaala ughwa kumwanya ukukinda abhandu abha pa chiisu." Ukwandila ishiku lila, uShaanalooli akamanyila ukuti isoki ukufuma kwa Chaala, shibhaghiile ukughendela na ku mwana umukeke.

Akapango aka kakutumanyisha ukuti manye tubhooghpaghe abhandu, loole tumwoghopaghe uChaala yuuyo akutesha isha kubhutiiyu isa muumwo ishu lyake likulingaanikisha. Ataliipo umundu naayumo yuuyo abhaghiile ukwimama ku maaso agha Chaala. Umundu ghweshi ali pabhwelu ni mbombo shaake shooshi shiisho akushibhomba.

## 12. AKAPANGO AKA YOONA NU MUKASHI

Akabhaapo umundu yumo yuuyo ingamu yaake akabha ghwi Yoona. UYoona akiikalagha mu chipanga icha Katengele. Umundu uyo akeegha umukolo yumo yuuyo ingamu yaake akabha ghwi Saala. Abhandu abha bhabhili bhakasenga inyumba yaabho yiyo yikabha nyisa leka, soona bhakabha bhakabhi ngaani. Umulume akabhombagha imbombo iya kughendesha amaghali. Umukashi akabhombagha imbombo isha pa kaaya. Pamupeene nu bhukabhi bhwabho, umukashi atakabha na kayilo akiisa. Akabhalilo kooshi akayaatagha na bhaliisha abhangi. Po umulume atakahobhokagha na kayilo aka mukashi. Amashiku ghooshi akamusokagha ukuti aleke akayilo kaake akabhiibhi, loole umukashi atakapulikagha. Po akamuleka ukuti endelelaghe ni mbombo shaake imbiibhi.

Ishiku limo umulume akamubhuula akati, "Ghwe mukashi ghwangu, ningeelo inguchuula ukubhuuka ku chiisu icha Malaabhi ni ighali." Umukashi akawamula akati, "Oogho! Oogho! Naapulika."



Po bhwo bhwacha pangeelo, umulume akalaabhila ni ighali lyake ukubhuuka ku Malaabhi. Po bhwo umulume aabhuuka ku Malaabhi, umukashi akahobhoka leka. Po akiinong'ona mu ndumbula yaake akati, "Ulu naakaagha akabhalilo akiisa aka kuyaata." Po umukolo yula akabhuuka pakumwitisha umuliisha uyungi ukuti iise ku kaaya kaake namasubha. Po umuliisha yula akitika ukwisa akabhalilo aka pabhushiku.

Bhwo lyafika ilya namasubha, umundu yula akabhuuka ku kaaya aka munine. Po umukolo yula akamupokeela nu kumwingisha mu nyumba. Po akamupiyiila ifindu, umundu yula akalya. Ku lusako ulubhiibhi, umulume atakachuula, akaghalkila mu sila. Po akaghalka ku kaaya kaake pabhushiku ngaani. Bhwo aafika pa kaaya, akapulika umundu akuyugha mu nyumba nu mukashi ghwake. Po akamubhuula umukashi ukuti amwighulile ichibhale. Bhwo umukashi aapulika ishu ilya mulume, akapaasha leka. Akaanda ukwinong'ona akati, "Kali, imbombo kooni nu muliisha uyu muno?" Nakalinga, akatumula ukumufifa umuliisha mukati mu ipiipa liilyo likabha na miishi mu nyumba mula. Po akamwighulila umulume ichibhale, umulume akiingila mu nyumba. Bhwo ingila, akamubhuusha umukashi akati, "Kali, ghwini yuuyo ghwayughagha naghwe mu nyumba muno?" Umukashi akamwamula akati, "Indaayughagha nu mundu naayumo."

Bhwo akabhalilo akanandi kaakinda, umukashi akamubhuula umulume akati, "Ghwe, mulume ghwangu, naabhiika amiishi agha kwogha, ingukusuuma uye ghwoghe." Po umulume akabhuuka pakwogha. Ku kabhalilo ako, umukashi akayaagha isila iya kumufumya umuliisha yula.

Akapango aka kakutumanyisha ukuti kabhiibhi umukolo ukubha na bhaliisha bhabhili.

## 13. AKAPANGO AKA NONGI NA BHAANA

Akabhaapo umundu yumo yuuyo ingamu yaake akabha ghwi Nongi. UNongi akabha na bhaana bhaake abhaliisha kalongo (10). Abhaana bhaake bhooshi bhakamusubhaalilagha ughwise ku findu fyoshi ifya mu bhwumi bhwabho.

Bhwo uNongi iibhona ukuti aanda ukughoma na maka ghoope ghaanda ukushila, akabhatesha abhaana bhaake, akaagha bhatakushaaghania ukuti linga aafwa ubhutolwe bhuliikwo kundaashi yaabho. Po akabhiitisha bhooshi nu kuyuga nabho ukuti abhuuke nabho nu kubhalanga kuukwo isahabhu shili. Abhaana bhala bhakasekela leka paapo bhakamanya ukuti linga bhaabha ni sahabhu, po bhabhwagha ubhukabhi.

Po akabhabhuula akati, "Mwe bhaana bhangu, ingulonda mweshi mweghe amakasu, isuula, amasembe ni suluulu." Po bhooshi bhakeegha fiifyo ughwise akabhabhuula ukuti bheeghe. Po bhakanyatuka ukubhuuka pamupeene nu ghwise. Bhwo bhaafika pa bhuyo bhuubhwo bhakabhuukagha, ughwise akabhabhuula ukuti




bhaande ukutema amakokwe nu kupuupa ichiposo. Abhaana bhala bhakabhomba imbombo iyo ku milungu mibhili, po bhakalita leka. Bhwo bhaamala, ughwise akabhabhuula akati, “Mwande ukukumbula ifipituula.” Bhakakumbula ku milungu mitatu, poope bhatakayaaga isahabhu naayimo. Pabhumalilo, ughwise akabhabhuula ukuti bhaande ukulima nu kubyala ifilombe. Po abhaana bhala bhakamubhuusha ughwise bhakati, “Ghwe taata, utwe tukulonda isahabhu isa muumwo ukatubhuulila kubhwandilo. Kali, ghwini akufilonda ifilombe?” Po ughwise akabhaamula akati, “Mu chiisu muno ifindu bhwo bhuubhwo bhukabhi, ubhukabhi yo yiyo sahabhu. Mwe bhaana bhangu, linga umundu aabha ni findu, kwo kuti ali ni sahabhu. Ukuyaagha isahabhu kukulonda utiishe amaafuku taashi.” Abhaana bhala bhakeendelela ukulima umughunda ghula ukufika paapo ughwise akafwa. Bhakiisubhaalila bheene, bhakaanda ukulya ifindu fyabho.

Linga umwana aakula soona eegha umukolo, kataa kiisa ukubhasubhaalila abhapaapi bhaake ku findu. Loole kiisa ukuti abhapaapi bhamusubhaalilaghe umwana.

## 14. ABHAANA ABHAKATA

Akabhaapo umukolo yumo yuuyo akabha na bhaana bhatatu abhaliisha. Abhaana abho bhakabha bhakata leka.

Umukolo uyo akabhombagha imbombo iya kulima mweneeshe. Abhaana bhala bhakayaataghaashe. Akayilo aka bhaana bhaake kakamukalalishanga leka ung'ina amashiku ghooshi. Abhakolo abhanine bhakamupulika bhwo akwilumbuusha ku nongwa iya bhukata ubhwa bhaana bhaake. Bhakamubhuusha bhakati, "Ghwe munyiitu, kali, kooni kwilumbuusha?" Umwene akabhaamula akati, "Nimunyiinyu indi nu bhutolwe ubhwa bhaana bhangu, paapo bhakukaana ukuunyaafwa ukulima. Ingulima nimweneeshe!" Abhanine bhakaswigha leka bhakati, "Ghwo! Ghwo! Ghwe munyiitu, isagha tukulingaanie isila iya kubhabhombela. Bhuuka ulonde amayondo na makondo matatu, upiiye mu ngumbe. Amakondo ghabhe pamwanya pa mayondo, po ubhabhuule ukuti bhapembaghe. Linga amakondo ghaapya, ukeeghe mabhili ulye nu kubhabhuula ukuti bhapembagheeshe paapo ghakaali ghatapiile bhwisa. Bhwo bhakwifwilisha umulilo, ukeeghe soona ikondo liilyo lishaalite mula mula ukuti umaliishe ukulya. Po ukabhabhuule ukuti ghaapya,



bhiipule. Po ughwe manye ukabheepo bhwo bhakwipula.” Po umukolo yula akabhapaalisha ngaani abhanine bhala nu kubhuuka ku kaaya kadke nu kushibhomba isa muumwo bhakamulingaanikisha. Bhwo aafika pa kaaya kaake, akabhungaania amayondo nu kughabiika mu ngumbe. Soona akeegha amakondo matatu nu kughabiika pamwanya pa mayondo nu kupiiya pa chooto ingumbe yila. Bhwo ghaapya amakondo ghala, umukolo yula akalya amakondo ghooshi matatu. Pabhumalilo akabhabhuula abhaana bhaake ukuti amakondo ghaapya nu kuti bhiipule, bhalyange. Ghwepe akatiilaapo.

Bhwo abhaana bhala bhakuti bhalabhule amakondo ghala, bhakaagha amayondo ghali mu ngumbe. Po bhakaswigha ngaani nu kupela ichisa ichikulu leka. Atakabhaapo umundu naayumo ughwa kubhaafwa. Po ishiku ilyo bhakaghona ni sala, bhatakalya naakamu. Po bhakashaaghania ukuti ngimba ung’ina atakabha ni findu ifya kubhapiiyila. Po ishiku ilya ningeelo pangeelo sululu, bhakalaabhila ngaani ku mughunda pakulima.

Akapango aka kakutumanyisha ukuti ubhukata bhutaa bhwisa mu chiisu. Choope ichisa ichishita mahala chitaa chisa. Lyope ni ishu ilya Chaala likutumanyisha likuti, “Umundu yuuyo atakubhomba imbombo, manye alyange ifindu.” (*Linga kulonda ukushaaghania ngaani, bhelenga mwa kalata ugwa 2 Bhatesaloniike 3:10.*)


## 15. UKALULU NI NGALAMU

Pabhubutali ngaani ifikanu fyoshi fikiikalagha nu kulya pamupeene. Fyoshi fikalyanga ichiposo. Chitakabhaakwo ichikanu naachimo icha kumwoghopa umunine.

Po ishiku limo iNgalamu nu Kalulu bhakachuula ukubhuuka ku chiisu icha kubhutali. Bhwo ishiku ilya kughaluka lyafika, bhakalonda isila iya kubhabhuula abha ku kaaya ukuti tukwisa. Akabhalilo kala ubhumanyi ubhwa kusimba abhokalata bhutakabhaakwo. Po bhakiitikana ukuti bhabhiitishe abha ku kaaya ukuti tukwisa. INgalamu yikamubhuusha uKalulu yikati, "Kali, nuughwe ghwe Kalulu linga kubhiitisha abha ku kaaya ku kashu kaako ako bhabhagiile ukupulika?" UKalulu akamwamula akati, "Loole ingukupaashikisha ughwe paapo ishu lyako likulu, loole litabhagiile ukufika kubhutali." Po bhakaanda ukukaanikana ngaani. Pabhumalilo, bhakiitikana ukuti bhapootane ukwitisha. INgalamu yikamanya ukuti ishu lyake lyene indilifike ku kaaya. Loole uKalulu akabhabhuula abhanine abhingi nu kubhabhiika mu sila yooshi ukuya kufika ku kaaya kaake. INgalamu yo yiiyo yikaanda ukwitisha ku maka ngaani. Po yikamubhuula uKalulu yikati, "Une bhaapulika ku kaaya." Ghwepe uKalulu akaanda ukwitisha na kashu kaake akanandi. Abhanine bhooshi bhaabho akabhabhiika mu sila bhoope bhakapokelesanianga ukuyugha indumi iyo ukufika ku kaaya aka Kalulu.

Bhwo iNgalamu nu Kalulu bhaafika ku twaya twabho, iNgalamu yikaagha ku kaaya kaake bhatashimeenyeku ukuti akwisa. Po bhatakatendekesha ifindu ifya kumupokeela, loole ku kaaya aka Kalulu bhakaagha kooshi akandu kaliipo. Umukashi ughwa Kalulu akati, "Naapulikite bhwo kwitisha mumasubha ukuti kwisa." INgalamu

yikaswigha leka nu kwibhuusha yikati, "Kali, nalooli ishu lyangu litakufika kubhutali?" Ngimba uKalulu akabhombelaa amahala. Akapamgo aka kakutumanyisha ukuti twinong'onaghe ingaani linga tukulonda ukubhomba shimo na bhanyiituu.




## 16. AKAPANGO AKA KAYAMBA NU KALULU

Pabhubtali ngaani akabhaapo uKayamba nu Kalulu bhaabho bhakabha bhamanyani ingaani. Akabhalilo kala bhukabhaakwo ubhutolwe ubhwa miishi. Po uKayamba akamubhuula uKalulu ukuti bhakumbe amiishi. UKalulu akashiita paapo akabha mukata. Po uKayamba akakumba mweneeshe nu kughaagha amiishi. Po akasengelela ulubhaghha ukushunguulila amiishi ghaake.

Bhwilaashe linga uKayamba akuya pakusemba amiishi, akaghaaghaghha amiishi ghaake ghanyalite. Po uKayamba akamubhuusha uKalulu akati, "Ghwe mumanyani ghwangu, kali, umubhweni yumo yuuyo akunyasha amiishi ghangu?" Po uKalulu akakaana lwoshi ukuti atamumeenye naayumo, soona atamubhweni yuuyo akanyashanga amiishi agha Kayamba.

Po ishiku limo, uKayamba akiingila mu bhwina ubhwa miishi ghaake nu kwimama. Bhwo iimamite, akaagha uKalulu aabhoneka pakwogha mu miishi ghaake. Po uKayamba akamwikata nu kumubhuusha akati, "Ghwe mumanyani ghwangu, ngimba ghweghwe kunyasha amiishi ghangu amashiku ghooshi?" UKalulu akaanda ukulamba nu kusuma uluhobhokelo ukufuma kwa Kayamba. Po uKayamba akamuuhobhokela. Akapango aka kakutumanyisha ukuti tubhombaghe imbombo pamupeene paapo shikutwafwa tweshi. Ubhuchefu bhutaa bhwisa mu chiiusu ichi.



## 17. AKAPANGO AKA “INDYEKI”

Akabhaapo umundu yumo yuuyo ingamu yaake akabha ghwi Fipuli. UFipuli akiikalaghha ku chiisu icha ku Mwiluti. UFipuli akasapa umulembo umukali leka ku bhandu ughwa kubha ni mboto mu mighunda yaake. Ingamu iya mulembo ughwo bhakatingi ghwi “Indyeki.” Umulembo ughwo akaghubbhombelaghha mu mighunda yaake nu kughoghela abha chikolo chaake na bhandu abhangiishe.

Akaghubbhombela umulembo ughwo ku kabhalilo akatali ngaani. Abhandu abhingi bhakafwa ku nongwa iya mulembo ughwo. Po abhandu abhingi bhakamwoghopagha leka pa chipanga chaake ni fipanga fiifyo fikabha papiipi naghwe. Bhwo abhachikolo chaake bhaafwa bhaashila, umulembo ghula ghukaanda ukughogha abhaana bhaake. Po pakamubhabha leka. Umundu yula akatumula ukughutaagha mu lusoko. Namasubha, akaagha umulembo ghula ghwfika mu nyumba yaake, ghukumubhuusha ghukuti, “Ghwe taata, ukwogha, noogha, kali, indiindyeki?”



Po uFipuli akakalala leka, akeegha umulembo ghula, akaghutiisania nu kughupembania. Loole namasubha akaagha ghwisile soona ghukuti, "Ghwe taata, ukundiisa, gwandiisa nu kwota umulilo, noota, loole ulu indiindyeki?" UFipuli akaanda ukwoghopa ngaani paapo akamanya ukuti ulu po ghukulonda abhaana bhaake. Akakinda ukubhuuka ku mupalamani ghwake nu kumupangila akapango kooshi nu kumusuma amwafwe. Umupalamani yula akamwamula akati, "Ghwe mundu ughwe, linga nalooli kulonda ingwafwe, bhuuka ku mupuuti."

Po akabhuuka naghwe ku mupuuti nu kumupangila shooshi isha mulembo ughwo. Umupuuti akamubhuusha akati, "Kali, nalooli kulonda ingwafwe ukuti umulembo ghwako ghutiile?" UFipuli akiitika akati, "Nalooli, ingulonda umulembo ughwo ghutiile." Po umupuuti akamubhuula akati, "Linga kulonda ukuti umulembo ughwo ghutiile, ghwanduke, ubhuleke ubhubhiibhi bhwako, mukongaghe uYeesu Kilisiti paapo umwene ali na maka agha kukwandula ubhwumi bhwako." UFipuli akiitika kuno akulila amaashooshi. Po umupuuti akabhuuka ku kaaya kwa Fipuli nu kughusuma umulembo ghula. Bhwo bhaaghubbiiika pandaashi pa mupuuti, umupuuti akatesha kumwanya nu kumusuma uYeesu ukuti aghubhoshe umulembo ughwo. Bhwo aamala ukwipuuta, po akaghwegha umulembo ughwo nu kughupemba. Po umulembo ghula ghukapya nu kulungula lwoshi. Ukwanda akabhalilo kala kala, uFipuli akabha mukilisiti ughwa nalooli. Akaleka ukupaasha, akaanda ukubhabhuula abhandu abhanine ubhubhiibhi ubhwa kusapa imilembo.


Akapango aka kakutumanyisha ukuti kataliikwo akandu naakamu kaako kabhaghiile ukumupoota uYeesu ukukatiisha ku mundu linga umundu uyo aapinduka ni ndumbula yooshi. Ku tubhalilo utu, abhandu abhingi bhapinyiighwe ni ngoye inyungi isha mbiibhi. Umundu ughwa kushaabhlula ingoye isho ghwi Yeesu. Ataliipo umundu naayumo yuuyo mupalapala kwa Yeesu. Ingamu yaake yikubhapoka abhandu bhooshi bhaabho bhakumwitika. Tukubhasuma mweshi mwe mupinyiighwe, isagha kwa Yeesu ukuti abhaabhule ingoye shiinyu. Kwa Yeesu shooshi shibhaghiile ukubhombighwa.

## 18. AKAPANGO AKA BHAASWIGHA NU MWANA GHWAKE UCHI IPO

Ifyinja ifya pabhalali ngaani, akabhaapo umundu yumo yuuyo ingamu yaake akabha ghwi Bhaaswigha. Umundu uyo akabha nu mukashi yuuyo ingamu yaake akabha ghwi Namwene. Abhandu bhabhili abho bhakapaapa umwana ghwabho umuliisha yuuyo ingamu yaake akabha ghwi Chiipo.

Abhandu abho bhakabha bhakabhi leka, bhakabha ni ng'ombe, imbushi na bhonang'ooshi. Bhwo umwana ghwabho akaali ukukula, abhapaapi bhaake bhakaliishanga ifyuma fyabho akabhalilo kooshi. Loole bhwo uChiipo aakula, abhapaapi bhaake bhakaanda ukumutuma pakuliisha ifyuma fyabho mu tughamba.

Ishiku limo bhwo uChiipo aafika pa kaghamba, akaanda ukukuuta akati, "Ghwe taata! Ghwe taata! Ichikanu ichi chili panu!" Bhwo ughwise aapulika, akeegha ingwegho ni suula, akanyatuka ukubhuuka ku kaghamba kuukwo umwana ghwabho uChiipo



akaliishanga ifyuma fyabho. Bhwo aafika, akaagha umwana ghwake uumite ni sesho, akuseka. Bhwo aamanya ukuti umwana aamushimbula imbwetete, ughwise akakalala leka. Po akamwegha uChiipo pamupeene ni fyuma fyoshi nu kughaluka ku kaaya. Bhwo aafika ku kaaya, po akamupangila umukashi shooshi shiisho akashibhona ku kaghamba kula akati, “Ghwe mukolo, umwana aatushimbulagha!”

Ishiku inine, uChiipo akabhuuka soona pakuliisha ifyuma fyabho. Bhwo aafika soona ku kaghamba, akaanda soona ukukuuta akati, “Eyoo! Eyoo! Unduuli uyuu! Akuungogha! Ghwe taata! Lubhilo! Lubhilo! Soona aaghogha ni mbushi yaako!” Bhwo ughwise aapulika, akeegha ingwegho ni sembe. Akanyatuka ukubhuuka kuukwo umwana ghwake akakuutagha. Bhwo aafika, akaagha umwana ghwake uChiipo akungunite paase, uumite ni sesho, akuseka. Po ughwise akamubhuusha umwana akati, “Ghwe mwana ughwe, kali, kooni kaako kuushimbula ni ghuuso ni mupala? Kali, umeenye ukuti liliipo ishiku limo liilyo indiukafwileepo musunga shaako isho?”

Bhwo lyafika ishiku inine ilya bhutatu, uChiipo akabhuuka soona pakuliisha ifyuma fyabho ku kaghamba. Bhwo aaliisha ifyuma fyake lyafika ilya namasubha, uChiipo akaanda ukubhwela ku kaaya. Bhwo akubhwela, mu sila akakomaana nu sheela. Po usheela yula akaanda ukumwoghofya. UChiipo akaanda soona ukukuuta ngaani akati, “Ghwe taata, ghwe taata, Ingufwa! Usheela akuungogha! Nalooli indakupiika!” Po ughwise nu ng’ina bhakasumbaashe, bhakabha myee, bhakati pamu akupiika ngimba nalooli. Bhwo kaakinda akabhalilo akatali, bhakaagha kwabha myee. Po bhakanyatuka ukukwela ku kaghamba ukuti bhamuteshe umwana ghwabho. Bhwo bhaafika kula, bhakaagha nalooli umwana ghwabho awfile lwoshi. Po ughwise nu ng’ina bhakaanda ukukuuta, bhakalila ngaani bhakati, “Ghwe mwana ghwitu ughwe, ghwafwilaapo ku nongwa iya kuti ghwatushimbulagha bhwilaashe. Ghwateshanga shiisho shaakubhonekela ulu?”

Akapango aka kakutumanyisha ukuti kataa kiisa ukubhashimbula abhapaapi paapo ubhaghiiile ukufwilaapo.

## **19. ULUSEKELO ULWA KAFUKI ULWA MAASHOOSHI**

Akabhaakwo umukolo yumo yuuyo ingamu yaake akabha ghwi Kafuki. Umukolo uyo akeeghighwa nu muliisha yumo. Bhwo eeghighwa, akiikala akabhalilo akatali ingaani chishita kubha nu mwana naayumo. Amashiku ghooghi akaswimaanagha mu ndumbula yaake. Ghwepe umulume akaanda ukumutamya nu kumutuka akatingi, “Ughwe utaa mukolo naakamu, imbaghiile ukukweghela umukolo uyungi.” Bhwo uKafuki aapulika amashu agha mulume, akati, “Kali, imbombe kooni ghwe Chaala ghwangu?” Akeendelela ukumwipuuta uChaala amashiku ghooshi.

Po akabhalilo kakafika kaako uChaala ghwake akapulika inyipuuto shaake. Akiibhona ukuti ali pabhung’wamu ubhwa mweshi ghumo. Loole atakashaaghanianga bhwisa ukuti ali pabhung’wamu. Bhwo yaashila imyeshi mibhili, akashaaghania ukuti nalooli ali pabhung’wamu. Po akasekela leka akati, “UChaala ghwangu aambelela ichisa ichikulu leka!”

Bhwo kaafika akabhalilo aka kupaapa, uKafuki akapaapa umwana umuliisha. Nakalinga, bhwo umwana aapaapighwaashe, akamuleka umwana umufyele pa masakata, akubhuuka ku bhapalamani nu kubhabhuula akati, “Mwe bhanyiit, ni munyiinyu naapaapa umwana, mwe uChaala ali ni chisa kukwangu.” Akaghenda ku bhapalamani bhooshi abha kaaya kala. Bhwo aamala ukubhabhuula, akagheluuka ku kaaya kaake. Bhwo aafika pa kaaya, akiingila mu nyumba ukuti amweghe umwana ghwake ukuti amwongeshe, akaagha umwana yula afwile, umiliile. Po akaanda ukulila ku maka ngaani mu nyumba yaake. Bhwo abhapalamani bhaapulika, bhakaanda ukubhungaana. Bhakamubhuusha bhakati, “Kali, kooni kaafika mu nyumba yaako soona?” Umwene akabhaamula akati, “Umwana ghwangu yuuyo naabhabhuulagha ukuti naapaapa, bhwo niingila mu nyumba, naagha afwile, umiliile!”

Po abhanine bhakeendelela ukumubhuusha bhakati, “Haa, ghwe munyiit, ngimba luulwo ghwisagha pakutupangila isha

kupaapighwa isha mwana ghwako, umulekite mweneeshe mu nyumba? Ughaaghite kuughu amaka agha kughenda-ghenda?" Po bhakati, "Aama munyiitu, ghweghwe ghwamughogha umwana ghwako! Manye ulilaghe, usumbeeshe ubhe myee." Bhwo bhaashiila umwana yula, umulume ughwa Kafuki akamukiisha umukashi pa kaaya. Po uKafuki akabhwela kukwabho.

Akapango aka kakutumanyisha ukuti linga uChaala aakwafwa shimo, kiisa leka ukwipulikisha taashi nu lusekelo lwako nu kupaalisha kwa Chaala bhwo ukaali ukubhabhuula abhandu abhanine bhaabho kulonda ukusekela pamupeene nabho.



## **20. AKAPANGO AKA MWILASEGHE NA BHAANA BHAAKE**

Akabhaapo umundu yumo yuuyo akiikalaghha mu chiisu icha Naasato. Ingamu iya mundu uyo akabha ghwi Mwilaseghe. Umundu uyo akabha na bhaana bhatatu.

Ishiku limo pabhushiku, akabhiitisha abhaana bhaake, akiikala nabho mu nyumba yaake. Akabhabhuula akati, “Mwe bhaana bhangu, ifyinja ifya kwikala numwe fyalema finandi. Niimanya ukuti akabhalilo kooshi kala imbaghiile ukufwa. Ulu naabhiitisha umuuusughu, ingulonda imbabhuule isha kubhaafwa mu bhwumi bhwinyu.” Po abhaana bhala bhakiitika bhakati, “Ghwe taata, tukusuma utulingaanie shooshi shiisho shibhaghiile ukutwafwa mu bhwumi bhwitu ukuti tushikongaghe.”

Po ughwise yula akeegha utukokwe, akamupa uyu kamu uyu kamu. Akabhabhuula akati, “Ingubhasuma ukuti ghweshi umundu aposole akakokwe kaake.” Po abhaana bhala bhakaposola utukokwe tula uyu akaake uyu akaake. Bhwo bhaamala ukuposola, ughwise akapinya utukokwe utwingi pamupeene. Po akamupa umwana yumo yumo ukuti aposole, bhooshi bhakapootwa ukuposola. Bhwo bhaapootwa, pabhumalilo akabhapo bhooshi utukokwe utupinye tula akati, “Ingubhasuma mwafwane ukuposola mweshi pamupeene.” Po bhooshi pamupeene bhakeegha utukokwe tula, bhakatuposola. Bhwo bhaatuposola, ughwise akabhabhuula akati, “Mwe bhaana bhangu, ukwanda umuuusughu mubhombaghe imbombo shiinyu pamupeene, manye mulekaanaghe, mubhange pamupeene. Paapo linga mukubhomba uyu mwene, uyu mwene, mutabtaghiile ukubhomba naachimo ichiisa mu bhwumi bhwinyu.”

Linga tukubhelenga ishu ilya Chaala, likutulingaania ukuti, “Mubhange pamupeene isa muumwo uYeesu nu Chaala bhali pamupeene.”

Akapango aka kakutumanyisha ukuti ukubhomba imbombo pamupeene kwisa leka linga mweshi muli nu lughano mu ndumbula shiinyu.

*(Linga kulonda ukushaaghania ingaani, bhelenga mwa kalata ughwa Yoohani 17:21.)*



Kama una maswali yoyote, au unataka kununua vitabu, au  
kuhudhuria darasa la kisomo, wasiliana na:

Namba za simu: 0767 665 527 / 0753 129 327

TSH 1,000/=